

Augsburg, 29. Juli 1576

An Theodor Zwinger

UB Basel, Fr. Gr. I 11, fol. 353r.

S. Dauidi Wirsungo suam in perferendis literis operam pollicenti, has dedi, ne occasionem ad E[xcellentiam] T[uam] scribendi amitterem. Ac quod ad τὸν γραμματοφόρον attinet, spero illum sua virtute atque industria et tibi et alijs se commendaturum: et ea est mearum commendationum ratio, ut eas amicis et patronis nolim esse molestas. Itaque pro tua prudentia et humanitate, adolescentem hunc, si merebitur (ut Augusti formula, ego minimè augustus, utar) tractabis. Id quod mihi inter caetera tua officia pergratum erit.

Quid Perna de editione Numismatum D. Adolphi et de libello anonymo, cui titulum feci, Ars rectè viuendi et bene moriendi, statuerit, ignoro. Autorem de occasione scribendi admonui. Ego verò miror, Hiero[nymum] Gemusaeum, virum doctum, et sui iuris acrem defensorem, et Gemistum περὶ ἀρετῆς, cuius nulla supersunt exempla, et Cydonium περὶ τοῦ καταφρονεῖν θανάτου, cuius segestria restare negantur, nolle recudere: cum ita nunc à me adornati videantur et illustrati, ut sint et vendibiles futuri, et in scholas bene constitutas recipiendi. Sed animaduertere videor, Oporinum nostrum meam συγγραφικὴν κατόρθωσιν secum abstulisse: nisi fortè senectutis meae culpa haec sit: cuius olim honestiss[imum] fuisse domicilium Sparta perhibetur: qua nihil est in hac urbe contemptius, nisi opibus et potentia sit munita: quae utraque me deficiunt. Itaque negligor ab ijs nunc, qui olim familiaritatem meam certatim appetiuerunt. Et fortasse plastrum, sponte pronum, οἱ ἐσονι^ται, quorum ὑποκριτικὴ πλεονεξία καὶ φιλοτιμία omnes potentum aedes firmis praesidijs occupauit, impulerunt. Interim ego gratias ago Deo, qui ita mihi prospexit, ut οἰκόσιτος esse possim, ac sine illorum opibus, bene beateq[ue], τουτέστι φιλοσόφως, viuere. Sed hoc παρέργως. Tu vir Cla[rissime] valebis, et me in tuorum habere numero non desines. Augustae Vindelicorum 1576. 4 Cal[endas] Augusti.

Hieronymus Wolfius
Tuus.